

AMARUBA GA YAKÔBO
Enshokolezi oku maruba
gayandikiragwa abemêzi
boshi Yak; 1 Pet; 2 Pet; 1 Ywn;
2 Ywn; 3 Ywn; Yud

Amaruba gàyandikiragwa abemêzi boshi gali nda: maguma ga Mutagatîfu Yakôbo, abirhi ga Mutagatîfu Petro, asharhu ga Mutagatîfu Yowane, na maguma ga Mutagatîfu Yûda.

Gaderhwa «katolika», kuleka aga kabiri n'aga kasharhu ga Yowane, ago maruba garhumiragwa abemêzi b'Ekleziya nyinji.

Amaruba ga Mutagatîfu Yakôbo

Gàyandikagwa na Yakôbo, mwene wâbo Yezu (Mat 13, 35; Mrk 6, 3). Ali mudâhwa mukulu w'e Yeruzalemu, afira obuyêmère omu mwâka gwa 62. Amaruba gâge agarhumiraga abakristu b'omu Buyahudi bali bashandabîne omu igulu, hôfi h'omwâka gwa 60. Rhulagîrîre oku bushinganyanya burhenga emwa Nnâmahanga lyo rhukolêsa obuyêmère bwîrhu bubonekere omu bijiro binjà. Rhuyâke akabôlo oku bakenyi, rhucîhangâne okurhandûla enfûzi n'abakana. Rhuyâke ebyâha by'olulimi, rhubè bashinganyanya, rhuyâke n'amagene g'en'igulu. Ensiku ziyîruka, abagalîre oku bâbo bacîfinja owafîre.

Amaruba marhanzi ga Mutagatîfu Petro

Gàyandikagwa n'omurhambo w'Entumwa erhi ali e Babiloni, yo e Roma, hôfi h'omwâka gwa 63 erhi ogwa 64. Obulangâlire burhumire abakristu bacîshinga ciru bakagera omu mbaka. Ebi abalêbi baderhaga rhwabishobwîre. Rhugwasirwe rhucîhangâne okuzigirana. Rhumanye oku rhwe lubaga lwîshogwa muli Kristu, rhumanyage okulama bwinjà ekarhî k'abapagani, rhukenge abakulu b'ecihugo; abashizi bayumve bannawâbo. Abashamuka bakenge obuhya n'obuzigire bulumîre omu cinyabuguma. Amango g'amalibuko, rhusimike rhunalole olwiganyo lwa Kristu wafâga aj'iyigîriza omu irimbo n'erhi afûka abwârhalala ekulyo kw'Îshe. Omu kukenga amababale ga Kristu rhucîhangâne okuyâka ebyâha. Kristu ye Lungere mukulu, co cirhumire balungere omu Ekleziya bakwânîne bamulolerekwo olwiganyo. Mpu abemêzi boshi bakâkenga abagula. Abacirhohya bo bashobôla engalo za Nnâmahanga.

Amaruba ga kabiri ga Mutagatîfu Petro

Gàyandikagwa enyuma ly'amarhanzi ga Petro. Wabona muganda muguma wa Petro wagayandikaga. Abakristu bashobwîre obwôrhère bw'okubà bâna ba Nnâmahanga banashubûzibwa omu cinyabuguma c'abemêzi. Ngasi muguma acîhangâne okuyâka abigîriza b'obunywesi. Ababî bâhanwe ci abinja bahâbwe oluhembo.

Amaruba ga Mutagatîfu Yowane oku gali asharhu

Gàyandikagwa n'Entumwa Yowane, ye wanayandikaga ecitabu ca kani c'Emyanzi y'Akalembe n'ec'Amafulûlo. Agayandikaga erhi akola mushosi, hôfi h'omwâka gwa 98. Amaruba marhanzi galimwo binwa bisharhu binene.

1. Okugenda omu bumoleke kugwêrhe njira ini: okuyâka ecâha, okukulikira amarhegeko bwenêne ery'obuzigire, okurhahira omurhima oku by'en'igulu, okucîlanga oku bashombanyi ba Kristu.

2. Okulama nka bâna ba Nnâmahanga, nakwo kuli kuyâka ecâha, kukulikira amarhegeko bwenêne ery'obuzigire, n'okucîlanga oku bashombanyi ba Kristu.

3. Iriba ly'Obuzigire n'Obuyêmêre ali Nyamuzinda yêne bulya ye warhanzir'irhuzigira omu kucîjira muntu kw'Omugala. Ntâkwo rhwakazigira Nyamuzinda buzira kuzigira bene wîrhu. Obuyêmêre bwarhengaga kuli Mugala wa Nyamuzinda wahamîrize omu mîshi n'omu mukò. Ye warhuhîre Mûka. Omu kuyêmêra Mugala wa Nyamuzinda rhuhâbwa obuzîne. Omwemêzi akaz'isengerera abanya-byâha. Omu maruba ga kabiri, mpu rhulame omu buzigire; banarhuhîre hange oku bashombanyi ba Kristu bo bakanywesi. Omu maruba ga kasharhu Yowane akunga Gâyo warhabalaga ebigolo biyâfîza Emyanzi y'Akalembe, alongôzize Diyotrefi wabulaga okuyankirira abajâ-bugo, ci ali akunga Demetriyo olanzire obuyêmêre.

Amaruba ga Mutagatîfu Yûda

Gàyandikagwa na Yûda, mwene wâbo Yakôbo (Yûd 1), nkaba naye mwene wâbo Nyakasane (Mat 13, 35), omu myâka ya 70-80. Aga maruba gayandikagwa okubwîra abakristu bacîlange oku bigîriza b'obunywesi; ahûnyire abakristu bazigirane banagwâsanye omu buyêmêre.

Omusingo

¹ Yakôbo, mwambali wa Nnâmahanga n'owa Nyakasane Yezu Kristu, ahânyire omusingo oku milala ikumi n'ibiri eshandabîne* omu igulu!

Oku omukristu akwânîne okuyôrha omu marhangulo

² Omu marhangulo ga ngasi lubero gammuyishira, mukacîshinga, bene wîrhu,

³ bulya murhahabiri oku amarhangulo g'obuyêmêre bwinyu kulêrha galêrha obuzibu bw'okulembera amalibuko.

⁴ Ci obwo buzibu bw'okulembera amalibuko bukole ebijiro nkana, lyo mubà bantu bashingânîne na bimâna, abarhabuziri cici.

Okushenga n'obulangâlire

⁵ Obuzire obushinganyanya muli mwe, abushenge Nnâmahanga, oshobôza boshi burhagera na buzira karhinda; abuhâbwa.

⁶ Ci kwônene ashenge n'obuyêmêre, buzira kurhindira ciru ehitya; bulya orhindira kwo ali nka kula omuvumba w'omu nyanja guhisibwa n'okuhêkwa eyi n'eyi n'empûsi.

* **1:1 1, 1** Abakristu b'omu Buyahudi bâli bashandabîne omu igulu.

⁷ Omuntu wa bene oyo arhalangâliraga mpu ankashobôla akantu emwa Nyakasane:

⁸ eri nderhera-habiri, nzunguzi omu majira gâyo goshi.

Kurhi omugale ayish'ïherêreker

⁹ Mwene wîrhu oli mukenyi acîshingire obukuze bwâge,

¹⁰ n'omugale naye asîme obwîrhôhye bwâge, bulya kwo ayish'ïkenyuka nka muligi gwa bwâso.

¹¹ izûba likashoshôka, linajire ecîdûrhudûrhu, libabule olubala; obwâso bw'emburho burhoge, ohabe aha obudukuliza bwâbwo bwamâjà. Ntyo kwo n'abagale baherêrekere omu njira zâbo.

Amashumi

¹² Iragi lyâge omuntu olembera amarhangulo! Bulya erhi abà amâgahima, anayish'ïhâbwa ishungwè ly'obuzîne Nyamuzinda alaganyagya abamuzigira.

¹³ Ntâye obage ali omu mashumi akaderha mpu Nyamuzinda omushumisire; bulya Nyamuzinda arhankashumikwa mabî, naye arhanashumika ndi.

¹⁴ Ci ngasi muguma ashumikwa n'amîru gâge mabî yêne; go gamukulula ganamugwâse.

¹⁵ N'erhi omuntu abà amâyêmêra ago mîru mabî, lyo gaburha ecâha, naco ecâha nka camayûs'ïjirwa, canaburha olufù.

¹⁶ Mumanye mwankahabuka, bene wîrhu bazi-girwa.

¹⁷ Ngasi ngalo nyinjà na ngasi nshôkano nkana bihubuka enyanya, birhenga emwa

Nn'obulangashane, orhahinduka n'orhayishi
cihôho ca muhindulo,

¹⁸ Yêne walonzagya okurhuburha omu luderho
lwâge lw'okuli, mpu rhubè rhwe murhondêrero
gw'ebiremwa byâge.

Okurhumikira Nnâmahanga kw'okunali

¹⁹ Murhahabiri aho, bene wîrhu bazigirwa:
ngasi muntu akâbangaduka omu kuyumvîrhiza,
ci arhabaga wa kuderha duba, orhanabaga wa
kukunira duba.

²⁰ Bulya obukunizi bw'omuntu burha-
jira omukolo gw'obushinganyanya bwa
Nnâmahanga.

²¹ Kuziga mukwêbe kulî ngasi byoshi
byankamuhemula na ngasi bisigaliza by'obubî,
munayankirire n'obwîrhôhye akanwa ka
Nyamuzinda karhwêragwa omu mirhima yinyu
mpu kammucize.

²² Mubè ba kujira akanwa ka Nnâmahanga, ci
arhali ba kuyumvîrhiza kwône, murhag'icîrheba
mwêne!

²³ Bulya oyumvîrhiza akanwa ka Nnâmahanga
arhanakajire, kwo ali ak'omuntu wasinza
obusù bwâge omu cilolero mpu alole iranga
aburhanagwa.

²⁴ Erhi abà amacîhenga, agende; ho n'aho anay-
ibagira kurhi anali.

²⁵ Ci ocisêza okumanya irhegeko limâna, liryâ
irhegeko lijira abantu bantagengwa, akanal-
isêrakwo, arhâbè wa kuyumva n'okuyibagira, ci
wa kujira, oyo ye wabone iragi omu kushimba
irhegeko.

²⁶ Erhi omuntu ankaderha mpu ali mwinjà omu idini lyâge, ci akabà arhish'ishuba olulimi lwâge, na ntyo acîrhebe yêne omu murhima, idini ly'oyo muntu liri lya busha.

²⁷ Idini licîre lirhanalikwo ibala omu masù ga Larha Nyamuzinda, muliyumvagye: okukarhandûla enfûzi n'abakana omu malibuko gâbo, n'okucîlanga buzira izâbyo en'igulu.

2

Okukenga abakenyi

¹ Bene wîrhu, irhondo mumanye mwankahira akabôlo omu buyêmêre bwa Yezu Kristu, Nnawîrhu w'irenge.

² Erhi mwakabà mutamîre omu ndêko, hakayisha omuntu oyambîrhe engolo y'amasholo n'omushangi mwinjinjà, hayishage obwo n'omukenyi oyambîrhe obwikunjè,

³ n'erhi mwankahindamuka, musinze olya oyambîrhe omushangi gwalangashana, mumubwîre, erhi: «Entebe eyi otamalage, waliha!» naye olya mukenyi mumubwîre, erhi: «Wêhe oyimange halâla», nîsi, erhi: «Otamale aha citumbi c'amagulugu gâni;»

⁴ k'erhi ntà kabôlo mujijire obwo, ka n'erhi murhacîjiziri batwî b'emmanja b'enkengêro mbî?

⁵ Leki mmubwire, bene wîrhu bazigirwa! Ka Nyamuzinda arhacîshogaga abakenyi b'en'igulu mpu babè bahirhi omu buyêmêre, banabè mîmo y'Obwâmi alaganyagya abamuzigira?

⁶ Ninyu mudwîrhe mwakabôla abakenyi! Ka barhali bagale bammushoshôba? K'arhali bo bammuhêka e kagombe?

⁷ K'arhali bo badwîrhe balogorhera Izîno linjà mugashâniza?

⁸ Mukâshimba liryâ irhegeko ly'oku bwâmi liri omu Mandiko lidesire, mpu: *Okâzigira owinyu nk'oku ocîzigira wêne*, erhi mujizire bwinjà

⁹ ci mukajira akabôlo, erhi câha mujizire, n'Irhegeko lyanammukaga nka bagoma.

¹⁰ Omuntu oshimba Amarhegeko goshi, erhi ankavunamwo cinwa ciguma cône, erhi goshi agomîre.

¹¹ Bulya owaderhaga, mpu: Orhahîra okahusha, ye wanashibig'iderha, mpu: Orhahîra okanigana. Ntyo, ciru wankabà orhahushiri, okanigana, erhi wanavunyire Irhegeko lyoshi.

¹² Enderho zinyu n'ebijiro binyu bibè nk'eby'abantu bayishi'itwîrwa olubanja n'irhegeko lirhuma abantu babà ntagengwa.

¹³ Bulya olubanja lurhababalira orhaba lukogo; ci olukogo kulimba lulimbira olubanja.

Obuyêmêre omu bijiro bubonekera

¹⁴ Cici bikwânîne omuntu, bene wîrhu, erhi ankaderha mpu agwêrhe obuyêmêre, nka ntà bijiro binjà ajira? K'obuyêmêre bwankamuciza?

¹⁵ Erhi mwene wîrhu nîsi erhi mwâli wîrhu bankabula eci bayambala erhi eci bashêga,

¹⁶ muguma muli mwe ajè aho, ababwîre, erhi: «Gendagi n'omurhûla, mukalûke, munayigurhe», ci arhacibahè eci omubiri gwâbo gulagîrîrekwo, kamalo kaci ebyôla byankalêrha?

¹⁷ Kwo obuyêmêre nabwo buli ntyo: nka burhagwêrhi bijiro binjà erhi kufà bufîre lwoshi.

18 Ciru hanajira owaderha, erhi: W'oyo ogwêrhe obuyêmêre, nâni ngwêrhe ebijiro binjà! Obwo buyêmêre bwêwe burhagwêrhi bijiro binjà, obunyêreke, niehe nakuyêreka obuyêmêre bwâni omu bijiro byâni!

19 Oyêmîre oku Nyamuzinda ali muguma yêne. Kuli kwinjà! Abashetani nabo banakuyêmêre, na musisi bageramwo.

20 K'olonzize okumanya, eci cingolongola, oku obuyêmêre buzira bijiro binjà kugumba bugumba?

21 Ka birhali bijiro byarhumaga larha Abrahamu ayêra, erhi abâna omugala Izaki nterekêro oku lûsho?

22 K'orhabwîni obwo oku obuyêmêre bwâli bulungine n'ebijiro byâge, n'oku bijiro byarhumire obuyêmêre bwâge bubà bwimâna!

23 Ntyo eci cinwa c'Amandiko cayunjula, ecidesire mpu: «*Abrahamu ayêmîre Nnâmahanga, n'okwo kwarhuma abâ musinganyanya, anayirikwa murhonyi wa Nyamuzinda*».

24 Mubwînage oku bijiro birhuma omuntu ayêra, ci arhali buyêmêre bwône.

25 Rahabu naye kwo na kwo, olya mukazi mugonyi. Ka birhali bijiro byarhumire ayêra, erhi ayankirira abalangûza, anabageza, omu yindi njira?

26 Nka kula omubiri gurhalimwo mûka gubà gufîre, kwo n'obuyêmêre burhagwêrhi bijiro bubà citù.

Ebyâha by'olulimi

¹ Bene wîrhu, mumanye muli mwe murhabâga banji balonza okubà bayigîriza; mumanyire oku olubanja lwîrhu lwayish'ibà ludârhi kulusha.

² Bulya rhweshi rhweshi rhunahabuke kanji. Akabà hali orhafumwa omu binwa, oyo muntu erhi acîbêrire mulume mwimâna, owankahash'irhegeka omubiri gwâge gwoshi.

³ Rhukashwêka akanwa k'eciterusi nti lyo cirhuyumva, citerusi coshi rhubà rhushwêsire.

⁴ Kandi mulole amârho g'enkuge; ciru gankaluga, ciru gankahunyangwa n'empûsi ndârhi, kurharhuma garhahêkwa n'engasi ntyanguli emunda omwêrekeza alonzize.

⁵ Olulimi nalwo kwo na kuguma. Cibà cirumbu cityanguli, ci lwanacikungira bintu binji. Obunyi bw'enkunyankunye burhayibuza okuyôca omuzirhu munene!

⁶ Olulimi nalwo gubà muliro, ebà nshôko y'obubî. Olulimi lubà aha kâgarhî k'emishaya yîrhu, luyahukiza omubiri gwoshi, lunahire engulumira omu buzîne bwîrhu bw'en'igulu, nk'oku lwône lugulumira n'omuliro gw'omu nyenga y'omuliro.

⁷ Ebyerubala bya ngasi lubero n'ebinyunyi, enjoka n'ebiyandala oku idaho, n'ensimba z'omu nyanja, byoshi byoshi bwenge bwa muntu bu-birhegeka bwo bwanayôrhaga bubirhegeka.

⁸ Ci olulimi, ntà muntu ciru n'omuguma wankahash'ilurhegeka: lubà cihûsi cirhadêkerera; luyunjwîre bwôge bulimwo olufû.

⁹ Lwo rhugashânizamwo Nyakasane na Larha,

lwo rhunahehêreramwo abantu balemagwa oku nshusho ya Nyamuzinda!

¹⁰ Omu kanwa kagama munarhenge obwangà n'omukago! Mâshi bene wîrhu, okwo kurhakwânîni.

¹¹ K'iriba linahululemwo amîshi minjà n'amalulu omu muloko muguma?

¹² Bene wîrhu k'omulehe gw'omutini gwankayânakwo amalehe g'omuzâbîbu? N'amîshi g'omu nyanja nago garhankaba minjà nk'ag'omu iriba.

Obushinganyanya bwinjà n'obubî

¹³ Ndi muli mwe oli mushinganyanya na mwenge? Ayêrekane n'olugendo lwâge lwinjà oku ebijiro byâge biri bya butûdu n'obushinganyanya.

¹⁴ Ci mukabà ba mujina n'obumvu omu murhima, mukanabà ba nnongwè, murhacîkungaga; murhananywerheraga okuli.

¹⁵ Obushinganyanya bwa bene obwo arhali enyanya buhubuka; ci buli bw'en'igulu, buli bwa ngeso mbî, buli bwa kuli shetani,

¹⁶ bulya aha obumvu n'ennongwè bifulukira harhabula kavulindi n'ebindi bibî bya ngasi lubero.

¹⁷ Obushinyanya bw'enyanya bwôhe, burhanzi bubà bucêse kandi bubà bwa murhûla, bubà bwa lukogo, butûla, buyunjwîre bwonjo n'emburho nyinjà*, burhajira kabôlo, burhanalyâliha.

* **3:17 3, 17** Emburho nyinjà byo bijiro binjà.

18 Emburho y'obushinganyanya erhabibwa aharhali murhûla, erhanakwânana abarhali ba murhûla.

4

Okuyôrha bwinjà

¹ Ngahi ebîrha n'entambala birhenga muli mwe K'arhali omu mîru ginyu mabî gakatula entambala omu birumbu binyu?

² Erhi mucîfinja akantu murhagwêrhi, muna-jekwo mukola mwaniga. Mukayâgalwa n'ehi murhankabona, munatule entambala mulwe amatumu. Murhajira bici bulya murhahûna bici.

³ Mukahûna murhahâbwa, bulya munahûne kubî, mpu mubone ebi mwagula amasîma mabî.

⁴ Ezi ndyâlya, ka kuhaba muhabire oku okuyinjibana igulu kuli kushombana na Nnâmahanga? Kwo kuderha oku owalonza okubà mwîra w'igulu anacîjire mushombanyi wa Nyamuzinda.

⁵ Ka mwêhe mumanyire mpu Amandiko busha gaderhîre, mpu: «Omûka arhuhiragamwo, Nyamuzinda aguzigira n'obuyâgalwa?»

⁶ Kwo kunarhuma arhugabira enshôkano elushire. Amandiko kwo kadesire mpu: Abacîbonyi Nyamuzinda kucika abacika, ci abîrhôhye bo ashobôza engalo yâge.

⁷ Kuziga lêro mukâyumva Nnâmahanga; mulwîse shetani, mwabona oku ammuyâkira kulî.

⁸ Yêgeri Nyamuzinda, naye ammuyegerera. Kalabi enfune zinyu, mwe banya-byâha; cêsi emirhima yinyu, ezi nderhera-habiri.

⁹ Mulakire ebyâha binyu, mujire emishîbo, munabande endûlù. Amasheka ginyu gashube mirenge, n'amasîma ginyu gahinduke mishîbo.

¹⁰ Mucîrhohye embere za Nyakasane, naye am-mukuza.

¹¹ Muleke okukaz'iderhana kubî, bene wîrhu. Oderhera mwene wâbo kubî, nîsi erhi omutwîra olubanja, erhi Irhegeko aderhîre kubî, erhi lyo anatwîrîre olubanja. N'erhi wankatwîra Irhegeko olubanja, obwo erhi orhaciri mushimbûlizi w'Irhegeko, ci erhi okola mutwî w'olubanja walyo.

¹² Omurhegesi n'omutwî w'emmanja ali muguma dolodolo, ye gwêrhe obuhashe bw'okuciza n'okuyîrha. Nâwe oligi ndi mpu waciambira okutwîra owinyu olubanja?

Abahirhi bacîmanyè, bacîkeke

¹³ Yumvagi ninyu we banakulâlira, mpu: «Ene erhi irhondo rhwâja muli cishagala cilebe, rhwayûsamwo omwâka, rhwarhimbûla rhunayunguke».

¹⁴ K'erhi mumanyirage obwo kurhi irhondo mwâbà? Obuzîne bwinyu buli cici? Muli mugî gubonekana hisanzi hitya, okuhandi guhirigirhe.

¹⁵ Kumanya murhankaderha erhikwo, mpu: «Nyakasane akalonza, rhwâba rhucirimwo omûka, rhujire kantu kalebe na kalebe».

¹⁶ Ci mwêhe, banyandumà, mudwîrhe mwacîkungira obucîbone bwinyu! Ngasi bukuze bwa bene obwo buli bubî.

¹⁷ Ntyo, omanyire aminjà ankajira, akanabula bwagajira, erhi câha ajizire.

5

¹ Oku bwinyu ninyu mwe bagale! Mulake, munabande endûlù kuli kabutindi wâmmuyishira!

² Obuhirhi bwinyu bwabozire, n'emyambalo yinyu yalundirwe n'enshwa.

³ Amasholo ginyu n'ensaranga zinyu byalibirwe n'engisha, n'engisha zâbyo zo zayish'immuyâgîriza zinasirîze emibiri yinyu nka kula omuliro gujira. Nêci, mwamanyir'ibîka erhi mubîka omu nsiku nzinda!

⁴ Ka murhabwîni oku oluhembo mwayimaga abakozi basârûlaga amashwa ginyu ludwîrhe lwa-banda endûlù n'oku emirenge y'abo basârûzi yahisire omu marhwiri ga Nyakasane Nya-muzinda w'emirhwe?

⁵ En'igulu mwarhogwîre mwanacîsîmîsa, mwayigusize amîru ginyu nk'oku lusiku lw'okuhuma omu mwamba.

⁶ Mwayâgîriza omushinganyanya mwana-muyîrha; arhaderhaga mpu acîfûngira.

Amahano mazinda

⁷ Mucîhangâne okulembera amalibuko, bene wîrhu, kuhika Nyakasane ayishe. Ka murhabona oku omuhinzi, erhi alinda emburho àkoyeraga y'omu kwâge, anahulike, alinge enkuba y'omuhangûko n'eya lukanga enie.

⁸ Mucîhumbire ninyu; musêze emirhima omu nda, bulya Nyakasane ali hôfi ayishe.

⁹ Murhakâg'ibêrana burhè, bene wîrhu, murhag'itwîrwa olubanja. Omutwî w'emmanja oyu wammuhika aha lusò!

¹⁰ Bene wîrhu, mulolere oku balêbi baderhaga oku izîno lya Nyakasane; mushimbe olwiganyo

lwâbo omu kucihangâna n'omu kulembera amal-
ibuko.

¹¹ Nêci, kuderha rhubaderha bany'iragi. Balya bacîkanyakanyize. Mwayumvîrhe bakûnga oku Ayubu acîhangânaga, mwânabona oluhembo Nyakasane àmuhîre. Bulya Nyakasane abà wa lukogo na wa bwonjo bunji.

¹² Cibwenêne, bene wîrhu, mumanye mwankakâcîgasha: arhali oku izîno ly'amalunga, erhi ly'igulu, nîsi erhi oku yindi ndahiro. «Nêci» winyu abè «nêci», na «nanga» winyu abè «nanga» lyo murhayish'iyâga omu lubanja.

¹³ Erhi hankabà oli omu malibuko muli mwe, ashenge. N'oshagalusire, ayimbe ennanga.

¹⁴ Erhi hankajira owalwâla muli mwe, anaham-agale abadâhwa b'Ekleziya, bamusengerere, banamushîge amavurha oku izîno lya Nyakasane.

¹⁵ Omusengero gw'obuyêmêre gwanafumya omulwâla; Nyakasane anamuyinamula, n'akabà ajizire ebyâha, anabikûlirwa.

¹⁶ Kuziga mukâfulûlirana ebyâha binyu, munakâsengererana, lyo mufuma. Omusengero gw'omushinganyanya washenga n'omurhima gwâge gwoshi gujira buhashe bunji.

¹⁷ Eliya ali muntu akîrhu; ashenga n'omurhima gwâge mpu enkuba erhaniaga, n'enkuba yajira myâka isharhu na myezi ndarhu erhaboneka omu igulu.

¹⁸ Ashub'ijà aho, ashenga, lêro enkuba yarhenga e malunga, n'obudaka bwayêra emburho.

¹⁹ Bene wîrhu, erhi muli mwe hankajira owa-habuka, arhenge omu njira y'okuli, n'owundi amugalule,

²⁰ owahàbûla omunya-byâha, amurhenze omu njira ali ahabukîremwo, amanye oku obuzîne bwâge abucizize olufù, n'oku âbabalirwa byâha mwandu.

BIBLIYA NTAGATIFU OMU MASHI
The Holy Bible in the Shi language of the Democratic
Republic of the Congo: Bibliya Ntagatifu omu mashi
(Bible with Deuterocanon)
La Sainte Bible en langue shi de la République
démocratique du Congo

copyright © 2024 BUKAVU Mashi and other Kivu Languages Bible

Language: Mashi (Shi)

Contributor: BUKAVU Mashi and other Kivu Languages Bible

Bibliya aha nfune ajage n'emurhima n'omu bijiro

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

32d7d8c6-4f1f-556c-bf3d-9ed771bbfd1e